

# «Pli che malgist d'inculpar il denunziader»

Giusep Nay dat in schlet attestat a la Dretgira chantunala

DA MARTIN CABALZAR/FMR

■ Il svari da la Dretgira chantunala han manà ad ina ferma crisa da confidenza e da credibilità. La FMR ha vuli savair da l'anterior parsura dal Tribunal federal Giusep Nay co el giuditgescha la situaziun spinusa.

*FMR: La cumissiun per giustia e segirezza dal Cussegl ha dà a Peter Schnyder cun ina reprimanda e propona da na betg reelegger el sco derschader chantunal. È questa sancziun commensurda ni ignorescha ella in dals principis ils pli elementars dal dretg sco quai che Schnyder pretendia?*

**Giusep Nay:** I n'è betg responsabel, mabain partischant da relaschar in verdict definitiv sur dal derschader Schnyder, suenter ch'ins n'ha – per motivs formals – betg fatg quai vers il president Brunner e suenter ch'ina inquisiziun sur dals derschaders che han sustegnì l'agir dal president vegn anc pir instradada! En il curt temp che la Cumissiun per giustia e segirezza – che sa cumpona tuttina da 11 personas – na pon quellas betg esser s'occupadas avunda cun la posiziun da Schnyder, mabain ha apparentamain mo confermà quai ch'els avevan gia decidì. Quai na respecta betg vairamain il principi ch'era liant gia en il dretg roman «audeatur et altera pars» che Rumantschas e Rumantschs chapechan.

*Èsi giustifigà che Schnyder, che ha rendì attent la publicità a l'apparenta midada da sentenza ed uschia a la violaziun d'uffizi tras il presient, vegnuss chastià a moda talmain severa?*

Na, quai è pli che malgist. Che la CGS croda en sin la strategia dals culpants da vulair sa defender cun attatgar e vesair mo ils sbagls dal denunziader e betg quels dals culpants, munta ina greva disditga da quella. Igl è enconuschent che quel che porta schletas novas – ils retgs laschavan gist executar tals – vegnan sentenziads, per uschia betg stuair s'occupar memia fitg dals culpants. Qua è Peter Schnyder en buna cumpagnia. Tar in'autorità da surveglianza n'è quai dentant betg perdunabel.

*La cumissiun ha constatà tar Norbert Brunner ina «violaziun fitg gravanta da l'obligaziun d'uffizi». Brunner nega dentant quai. Co giuditgais Vos la situaziun?*

Sch'insatgi mussa e stat mo tar ses puntili, era sche tut ils fatgs din il cuntrari, è quai il president Brunner. Per il derschader Schnyder pleda il fatg, ch'igl è almain evident ch'il president e l'entira dretgira han vuli cuschentà la midada fitg dispitaivla da la sentenza vers las partidas e la publicità. Sch'ins avess gi buna conscienza en questa chaussa, avess quai pudì vegnir fatg transparent senza problems ed era empruvà da giustifigar.

Buna conscienza n'avevan il president e ses adherents dentant apparentamain betg. Giuditar penalmain la chaussa sto la Procura publica ed alura la dretgira cumpetenta, suenter che l'immunità dal derschader è abolida: In fatg ch'è a mes savair unic, en scadin cas en il Grischun. Il Cussegl grond vegn prudentamain a spetgar quest giudicament penal.

*Èsi usit ch'il president e l'actuar d'ina dretgira pon midar posteriuramain ed en atgna cumpetenza in dispositiv?*

Na, segir e nagliur ed en nagin cas è quai lubì. Quai è ina violaziun eclatanta da las reglas fixas e fundamentalas per render ina sentenza uschia che quella è alura era valaivla. La pratica da nossa Dretgira chantunala fa perder burgaisas e burgais tutta confidenza en quella, sch'ins na sa betg, sche la decisiun è vairamain vegnida tratga uschia u betg dal gremi cumpetent. E la CGS giuditgescha questa pratica a moda bler memia miaivla.

*Il parsura Norbert Brunner rinfa tscha che la politica sa maschaidia en la giustia. N'è quai dentant betg legitim en quest cas concret?*

Quai che la CGS ha fatg – e che er il Cussegl grond vegn a stuair far – n'è absolutamain nagin sa maschadar en en la giurisdicziun, en la quala la terza puz-

sanza è independenta. Ins sto differenziar tranter quella e sia administraziun ed organisaziun. Là è la dretgira suttamessa tenor lescha a la surveglianza politica. Per la buna administraziun ed organisaziun vai er, sche las reglas, co las decisiuns èn da prender, na vegnan betg respectadas, e sche sbagls en quest regard vulan vegnir cuschentads. E gist per quai vai en questa chaussa. E sch'il president da la Dretgira chantunala fa valair l'indipendenza, sche n'enconuscha el betg il dretg vertent u fa quai opportunisticamain. En tuts dus cas dat quai ad el in fitg schlet attestat.

*Co giuditgais Vos il grond culm da pendenzas tar la Dretgira chantunala, e tge mesiras èn tenor Vos las pli cunvegnetas per far remedura?*

Era quai è in fatg zunt gravant. La CGS sto percunter prender qua sasezza per il nas, damai che las pendenzas fuvan ditg enconuscentas sin fundament dals rapports annuals da la dretgira che vegnan suttamess al Cussegl grond. Er davart la dretgira sezza n'èn vegnidas fatgas valair naginas istanzas al Cussegl grond per obtegnair ils meds necessaris e per che la giustia possa agir en mintga cas a moda correcta ed en temp util, senza stuair vegnir admonida dal Tribunal federal sco quai ch'è succedì recentamain cun plets clers sco anc mai. Quai sto uss purtar fritg.

*Co valitais Vos l'entira problematica da la credibilità da la Dretgira chantunala, e tge soluziuns èn pussaivlas per recuperer la confidenza rampunada?*

La CGS na vesa pervi dal gaud da dumondas betg las vairas singulas plantas marschas che fan che l'entir gaud è grev malsau. Igl è da sperar ch'igl ulteriur andament portia ils scleriments necessaris, senza retegnientschas politicas. La surveglianza è in'obligaziun eminentamain giuridica che ha da succeder tenor il dretg vertent. L'elecziun da derschader e derschaders tras il Cussegl grond è bain in act politic. Er quel na dastga dentant betg succeder arbitrariamain, quai che fiss il cas, sche l'autorità da surveglianza giuditgescha il sbagl dal derschader Peter Schnyder a moda disciplinara pli miaivla e la politica sancziunass quel dentant cun in chasti il pli grev cun betg reelegger el. Pir in recurs vegniss probabel a decider definitivamain il cas. La soluziun correcta e praticamain pussaivla sa mo esser quella d'elegger suenter la bainvegnida demissiun da l'actual parsura ina presidenta u in president ch'è vairamain abel da manar quella dretgira – cun in team da coaching proponì – sco era da reelegger tut(ta)s derschadras e derschaders che s'obligheschan a la prontezza da collavurar in cun l'auter.

**L'intervista è vegnida fatga en scrit.**